

東槎紀畧自序

臺灣海外一郡耳懸絕萬里而糖米之貨利天下帆檣所至南盡粵閩兩浙東過江南山東北抵天津以極瀋陽旬月之間可達也地亘千里沃饒甲於南服然其人蕃庶強悍易動難靜歸化百四十年亂者十數起械鬥劫掠比比有之

國家歲費帑金二十八萬設一總兵三副將水陸十六營戍兵一萬四千六百有奇其重之也如此夫無事則享其利有事則弄其兵區畫而措置之者吏也置兵所以治民治其民不可不知其情知其情不可不審其勢審其勢不可不察其機故情得則勢見勢見則幾明勢見幾明而方畧出焉矣顧或習近閭閻

東村集 卷一
而闇於制度或銳意興革而昧於事情逐末者忘本務名者乖
實言之娓娓而無所用發於其政害於其事利害相乘不可不
辨也嘉慶己卯庚辰之歲余從政臺邑兼攝南路同知今

上元年權判噶瑪蘭稍識全臺大畧嘗有所言上官弗善也未
幾罷去癸未春先師趙文恪來督閩浙軍深憂海外特請以知
福州府方君往守屬要務十餘事焉君知無不言每陳事文恪
未嘗不稱善立從所請卒能戡弭禍亂海外以安甲申夏五中
丞孫公巡臺表上其績會

詔問賢能文恪以君對擢汀漳龍道仍守臺事又一年文恪督
雲貴去乃易夫天下治安在守令督撫雖賢耳目固難真切卽

切矣而奉行之實仍待其人故知之而不能言咎在其下言之而不能舉咎在其上若夫言而舉之合如鍼芥吾不以羨君之過而歎文恪之知君能竟其用也余以羈憂棲遲海外目睹往來論議區畫之詳實能明切事情洞中機要苟無以紀之懼後來者習焉不得其所以然設有因時損益莫能究也乃採其要畧於篇附及平素論著涉臺政者而以陳周全之事終焉世有審勢察幾之君子尙其有采於茲道光己丑冬月

東槎紀畧目錄

桐城姚瑩著

第一卷

平定許楊二逆

復建鳳山縣城

改設臺北營制

改配臺北班兵

籌給艚舦營兵米

籌議商運臺穀

籌議臺穀留餘

議建鹿耳門砲臺

埔裏社紀畧

第二卷

籌議噶瑪蘭定制

第三卷

噶瑪蘭原始

噶瑪蘭入籍

西勢二十社

東勢十六社

沿邊各隘

施八坑

噶瑪蘭廳異記

噶瑪蘭厲壇祭文

臺北道里記

第四卷

臺灣班兵議上

臺灣班兵議下

臺灣兵事第一書

臺灣兵事第二書

與李信齋論治臺書

與鹿春如論料匠書

第五卷

陳周全案紀事

東槎紀畧卷一

桐城姚瑩著

平定許楊二逆

臺灣入籍一百四十年姦民十一起浮動好亂其土性然也生齒日繁所在多遊手非械鬥則爲盜道光三年趙文恪督閩患之慎選守令以福州府方傳穉署臺守一時臺灣道孔昭虔臺灣縣李慎燹鳳山縣杜紹祁嘉義縣王衍慶淡水廳吳性誠噶瑪蘭廳呂志恒皆有聲四年五月鳳山縣打鼓山鳴園竹生花七月逢閏民間以爲昔林爽文反有此兆訛言間起臺防同知缺杜紹祁代之署鳳山縣者劉功傑也頗銳意捕盜未幾而許

尙之事起許尙者鳳山廣安庄人業賣栳榔素結諸無賴羣盜
悅之爲鄉保所告懼捕遂與所善蔡雙弼張仔來高烏紫王曾
楊良斌沈古老徐紅柑林溪及番人潘老通謀反其黨甚衆期
以十月十一日集議先攻下淡水縣丞署次攻埤頭遂及郡城
苦無費先肆刦掠時反謀未露也傳稔聞盜檄縣急捕尙將起
其庄人劉黃中微聞其謀留諸家勸之不使尙出功傑捕尙及
良斌不得焚其居跡至黃中家十三日遂以尙獻械繫馳送于
郡傳稔親訊之得其反狀言于鎮道曰許尙之黨俱在事破必
速亂埤頭無城不可守也劉令初仕其叅將又懦宜增兵防且
臺地匪民所在嘯聚甚易曩者南路有事則北路起應北路有

事則南路騷動郡兵常苦爲所掣今宜及未起速備北路俾我
得專力於南鎮道皆然之乃密飭嘉漳淡水爲備時苦積潦郡城
嘉義城垣皆圯急繕治之而使紹祁偕縣丞丁嘉植都司翁朝
龍以郡兵二百協守埤頭埤頭者鳳山縣治也舊縣燬于林爽
文移治埤頭僅樹竹圍又燬於蔡牽故慮之至則民間已紛言
賊起爭避郡城然莫知賊所在營縣日出清庄捕賊十餘人最
後得其軍師林溪許尙之被獲也其黨將散楊良斌不可衆乃
推良斌爲首聚議黃梨山中良斌製刀杖旗幟使潘老通借炮
於其舅番通事潘巴能以林溪爲軍師王曾爲都督領紅旗李
川鄭榮春爲正副先鋒領烏旗蔡雙弼以下皆爲頭目分招賊

衆期二十四夜攻埤頭戕官據地卽乘勝攻郡城使徐紅柑自臺灣沈古老自嘉義各招其黨並起又使吳賜潛入郡城結匪民內應約既定二十一日林溪至埤頭市五色綢製旗溪故縣中白役偵賊者也陰爲賊主謀官所往賊先知之故其謀甚密溪市得綢使人持往已將飯而後行其母詰知出首故獲之訊未卽服良斌見獲溪不待衆集二十二夜遂以賊數百人分西北兩路攻埤頭殺苦苓門汛兵自竹圍隙處以入埤頭先有備紹祁功傑守縣署朝龍嘉植守倉賊先至倉朝龍揮兵擊之傷斃二賊賊燃大炮不震遂敗走其縣前賊已砍柵門將入亦爲鄉勇擊退叅將某聞賊擁兵火藥庫不出翼日語朝龍曰賊雖

敗必且大至埤頭倉署皆不可守火藥庫有土垣四面阻水昔
蔡牽攻不能破可速據此朝龍惑之遂移兵入文官相率隨入
民大惶懼奔逃姦人乘間搶掠塘報兵又爲賊殺道路遂梗二
十三夜郡中聞警乃議昭虔慎燹以城守左營及安平水師兵
守郡傳穢與署臺鎮趙裕福中營遊擊楊俊督師援鳳山許尙
猶在府監斬之而後行時郡中訛言四起人心震駭紳士韓高
揚黃化鯉等入見傳穢請方畧傳穢曰鳳山雖一隅距郡城百
里賊朝發可夕至也恐有姦宄應之宜固根本今郡城垣壞漏
夜築之兩日可竣城內外街市多立木柵君等率丁壯隨李令
日夜親巡城上分布兵勇安平副將率水師六百人駐西城外

螻蛄石以衛商行爲犄角城內設勁兵三百人環甲露宿足爲策應各衙門及紳士家皆募鄉勇以收遊民無使助賊惟大兵南下賊必潰走當遏之勿使越入郡境已飭臺灣嘉義營縣分屯兵勇扼其要隘且令各庄耆簡壯丁相爲守援土賊不得往應則吾事濟矣或請閉郡入門曰不可南路難民避賊者日數千至不能無納且毋使北路謠傳郡城被困啟姦人心也道試甫畢各學官俱在率兵役守門稽出入而已衆悅守備遂嚴二十四日鎮將兵起傳樞部署畢二十五日亦以兵二百鄉勇二百繼之經阿公店南北適中地也民居頗稠留兵勇二百人使訓導謝代堦駐之以扼其衝道乃通二十六日至埤頭撤功傑

使紹祁回任署鎮亦撤其叅將以朝龍代傳璫乃督民夫增補竹圍繞圍濬深溝中插竹籤招撫逃民諭各鄉守庄捕賊其先受賊約能自首者免罪紹祁更募鄉勇八百名以四百人守埤頭四百人偕官兵捕賊縣役中有通賊者不敢動而頗自危紹祁大度示之不復窮究反側遂安賊自埤頭走黃梨山豎旗招衆鎮將初至不測賊衆寡又以負險頗患之未遽擊旣而各路兵屯鄉庄受府縣約束阻守要隘甚密所在匪民觀望待起者不下數千賊不能通至是竟無敢應者嘉義賊將自內山潛至扼于王李二令皆散走吳賜至郡城爲愼藝獲誅新授臺灣鎮蔡萬齡亦至良斌見衆不集大懼其黨乃離兵勇進攻之遂潰

傳穰紹祁亟懸重賞捕賊王曾李川蔡雙弼以下全獲伏誅良
斌駕小舟入海迹至彰化縣令李振青獲之送郡南路遂平是
役也自許尙起及竣事僅一月不煩內兵不使賊蹂躪閭閻南
路辦賊北路宴如凡用餉銀數萬皆籌款補給不費帑金者郡
縣得人之效也奏入

上大嘉之曰方傳穰總司籌辦悉協機宜特賞花翎鎮道以下
各從優議叙明年乃建鳳山縣城於舊治